



Umhverfis- og auðlindaráðuneytið
Skuggasundi 1
101 Reykjavík

postur@uar.is

20. desember 2018

Mál: Verkefni nefndar um stofnun þjóðgarðs á miðhálandinu. Greining tækifæra og áherslur í atvinnustefnu. S-237/2018.

Samtök atvinnulífsins og Samtök iðnaðarins (samtökin) telja mikilvægt að atvinnustefna í fyrirhuguðum þjóðgarði á miðhálandinu byggi á hugmyndafræði sjálfbærrar þróunar þar sem gætt er efnahagslegra og félagslegra sjónarmiða engu síður en umhverfisverndar.

Íslenska þjóðin hefur um langa hríð nýtt miðhálandið til samgangna og flutninga, veiða, í þágu landbúnaðar, ferðamennsku og orkunýtingar auk þess sem vernd fágætrar náttúru og umhverfisgæða hefur verið höfð að leiðarljósi. Í flestum tilvikum getur þetta allt farið ágætlega saman eins og dæmin sanna.

Samtökin telja nauðsynlegt að áfram verði unnt að stunda fjölbreytta nýtingu náttúrugæða á miðhálandinu án þess að um of verði gengið að náttúrunni og að umhverfið bíði varanlegt tjón af.

Í nýlegum lögum um náttúruvernd (nr. 60/2013) er í 47. gr. að finna ákvæði sem takmarkar verulega alla nýtingu auðlinda í þjóðgörðum. Mikilvægt er að þess verði gætt við stofnun þjóðgarðs að friðlýsingar innan svæðis garðsins geti verið mismunandi og að unnt verði að efla samgöngur á ákveðnum svæðum, að stunda ferðamennsku, veiðar og nýta beitarlönd, að unnt verði að leggja fjarskiptaleiðslur og raflínur um tiltekna leiðir, að sum svæði geta hentað afar vel til nýtingar vindorku og önnur jafnvel til nýtingar annarra orkukosta. Allt er þetta hluti þess að tryggja hagsmuni þeirra sem landið byggja og möguleika komandi kynslóða til að sjá sér og sínum farborða.

Það virðist því nauðsynlegt fyrir nefndina að horfa vítt á viðfangsefni sitt og taka mið af mörgum sjónarmiðum og gæta ákveðins jafnræðis þegar komist er að niðurstöðu og þrengja ekki um of að hugsanlegri nýtingu náttúrugæða í fyrirhuguðum þjóðgarði ásamt því að tryggja framgang eðlilegra verndarsjónarmiða.

Virðingarfyllst,

f.h. Samtaka atvinnulífsins

f.h. Samtaka iðnaðarins